

### 0.0.1 padesasuttam

1. ekaṃ samayaṃ āyasmā ca sārīputto āyasmā ca mahā moggallāno āyasmā ca anuruddho sākete viharanti, kaṇṭhakīvane<sup>1</sup>. atha kho āyasmā ca sārīputto āyasmā ca mahāmoggallāno sāyanhasamayaṃ paṭisalānā vuṭṭhitā yenāyasmā anuruddho tenupasaṅkamimṣu. upasaṅkamitvā āyasmatā anuruddhena saddhiṃ sammodimṣu. sammodanīyaṃ kathaṃ sārāṇīyaṃ vītisāretvā ekamantaṃ nisīdimṣu. ekamantaṃ nisinno kho āyasmā sārīputto āyasmanthaṃ anuruddhaṃ etadavoca: "sekho sekhoti<sup>2</sup> āvuso anuruddha, vuccati, kittāvatā nu āvuso sekho hotī"ti.

2. catunnaṃ kho āvuso satipaṭṭhānānaṃ padesaṃ bhāvitattā sekho hoti. katamesaṃ catunnaṃ: idhāvuso bhikkhu kāye kāyānupassī viharati ātāpī sampajāno satimā vineyya loke abhiññhādomanassaṃ. vedanāsu vedanānupassī viharati ātāpī sampajāno satimā vineyya loke abhiññhādomanassaṃ. citte cittānupassī viharati ātāpī sampajāno satimā vineyya loke abhiññhādomanassaṃ. dhammesu dhammānupassī viharati ātāpī sampajāno satimā vineyya loke abhiññhādomanassaṃ. imesaṃ kho āvuso catunnaṃ satipaṭṭhānānaṃ padesaṃ bhāvitattā sekho hotīti.

---

<sup>1</sup>kaṇḍakīvane - machasaṃ.

<sup>2</sup>sekkho sekkhoti - syā.